

# FISI NA INI



Kimotho G. Gabriel

Kimechapishwa na:  
Starlink Translation Centre  
P.O. Box 241-00600 Nairobi

© Kimotho G. Gabriel, 2017

Haki zote zimehifadhiwa. Hairuhusiwi kuiga, kunakili,  
kupiga chapa, kutafsiri au kukitoa kitabu hiki, kwa jinsi  
yoyote ile, bila idhini, kwa maandishi, ya Kimotho G.  
Gabriel.

Chapa ya kwanza 2017

ISBN 978-9966-1979-0-0

Michoro imechorwa na Abraham Ngume  
Kurasa zimeruwazwa na Puritan Designs

Zamani za kale Fisi alikuwa mnyama mwenye furaha nyingi. Aliishi vizuri pamoja na wanyama wengine. Ila yake moja tu ilikuwa ni ulafi. Aliogopwa na wanyama wengine na walimsema kuwa angemla hata mwanawe. Sifa hii ilimpa Fisi hofu kubwa. Jioni moja alienda kwenye pango, akapiga magoti



na akaanza kusali. Alimwomba Mungu amwondolee ulafi ambao ulimpa sifa mbaya. Pia alimsifu Mola amwondolee tamaa ya kula nyamafu. Aliomba kwa muda mrefu hadi akalia machozi. Mungu alimwahidi Fisi kwamba kila ombi lake lingetimizwa na kwamba angemsaidia kwa kila njia. Mungu alimwambia Fisi kwamba lazima awache kuwa mchoyo na awe akiwafikiria wengine kwa kila njia. Fisi alifurahi si haba. Alimshukuru Mungu na kuenda nyumbani mbio.

Aliwaita Fisi wote wa familia yake. Waliketi pale nje na kumsikiliza kwa makini sana. Fisi aliwaelezea jinsi Mungu alivyomwahidi kwamba atawaondolea mambo yaliyowafanya wachukiwe na wanyama wengine.



Aliwaambia kwamba lazima waanze kubadilisha tabia zao na kuishi vizuri na kwamba Mungu alikuwa nao. Fisi wote walifurahi sana. Mmoja wao alisema kwamba lilikuwa jambo mbaya kwani mnyama yeyote akifa, wao ndiyo walikuwa wakiukimbilia ule mzoga na kuula. Aliwaambia kuwa ilikuwa vibaya kwamba wakati wengine wakiomboleza kifo, wao walikuwa wanafurahia mzoga.



Wote waliagana kuufuata mkataba huo mpya.

Siku moja, Fisi alichukua mfuko wake na kutoka kutafuta chakula. Alikuwa amefurahia mabadiliko yaliyokuwa yamewapata. Alitembea huku akiimba nyimbo za kumsifu Maulana. Baada ya muda mrefu alishtuliwa na kitu fulani kilichopitia machoni mwake na



kuanguka mbele yake. Lilikuwa ni ini kubwa. Fisi aliinama na kulichukua lile ini. Alimshukuru Mola kwa kuzidi kumsaidia. Alimwambia Mungu kwamba hatamsahau kamwe. Aliliweka kwenye mfuko wake huku akisema kwamba angelipeleka nyumbani ili wale na familia yake. Aliendelea na safari yake akiimba.



Fisi alikuwa na raha. Alienda akijiambia, “Kweli asemavyo Mungu ni kweli, omba na utapewa, bisha na utafunguliwa... kweli Mungu ni wa maajabu.” Baada ya hatua kadhaa akasikia tena phu!, kuangalia akaona kwamba lilikuwa ini lingine. Fisi alifurahi si haba. Aliona mkono wa Mungu ukimwongoza. Alicheka na kurukaruka kwa furaha. Mbona miaka hii yote sikujuana na Mungu? Fisi alijiuliza. Kumbe mawindo yake hayangekuwa ya taabu vile. Alilichukua ini na kuliweka kwenye mkoba wake. Baada ya hatua kadhaa, mara tendo lile lile likatokea. Ini lilianguka mbele yake. Fisi aliketi chini. Haya yalikuwa maajabu, kweli Mungu ni mwenye huruma. Sasa alikuwa na maini matatu. Alijua kwamba jamii yake ingefurahia sana mambo haya





mapya. Aliliweka kwenye mkoba na kuendelea huku akisifu.

“Kweli sasa naamini wewe Mungu ndiye muumba wa kila kitu. Naamini kuwa wewe ndiye njia. Nitakufuata kila niendapo na hata jamaa yangu nitawaonyesha wakufuate. Umenitenda wema.”

Baada ya hatua kadhaa ini  
lingine likaanguka. Fisi alifurahi mno.  
Alilichukua na kuliweka kwa mkoba.  
Alipinduka na kusema kwamba jamii  
yake ingeshiba yale maini manne.  
Alianza safari ya kurudi. Hakuenda  
mbali, mara ini lingine likaanguka phu!  
Karibu alikanyange. Aliliokota kwa  
haraka. Sasa alikuwa na maini matano.  
Dhamiri fulani zilimwambia ale ini  
moja. Hata hao wengine wangeenda  
kujitafutia chakula chao. Hata wao  
walikuwa na miguu na wangeweza  
kujitafutia kama tu alivyofanya. Akili  
ingine ikamwambia kwamba, hamna  
haja, ingekuwa vizuri akafurahie na  
wenzake. Kwa hivyo aliendelea kurudi  
nyumbani kwa hatua kubwa kubwa.

Muda mfupi baadaye, ini lingine  
likaanguka mbele yake. Aliliokota  
haraka haraka na kuliweka kwenye  
mkoba. Alipiga hatua chache tu  
na kuliona ini lingine. Sasa fisi  
aliketeti. Aliona ni vizuri kupanga  
jinsi angeyagawa yale maini. Moja  
linge kuwa lake binafsi kwani yeye



ndiye alikuwa ameyapata yote. Hayo mengine yangepiganywa na Fisi wengine sawa sawa. Aliamka na kuelekea nyumbani.

Aliwapata Fisi wote pamoja na watoto wake wanne wakimngoja kwa hamu. Walikuwa na njaa. Alipowaona alicheka. Alisimama na kuwaangalia wenzake. Aliwapa kisa chake. Aliwaambia kwamba alikuwa na maini mengi ambayo yangewatosha. Aliwaambia kwamba yeye angekula ini moja peke yake ili waone kwamba yote yalikuwa mazuri. Aliingiza mkono kwenye mkoba wake na kutoa ini. Alipokuwa akila, Fisi hao wengine walikuwa wanatiririkwa na mate kama chemi chemi ya maji milimani.



Walimkondolea macho yao  
makubwa. Yule Fisi alikula kwa staha.  
Alipomaliza aliwaambia kwamba  
angewapa kwanza watoto wake halafu  
wale wengine wote.

Fisi alitumbukiza mkono kwa  
mkoba na kuutoa. Hamkuwa na kitu.



Aliutumbukiza tena. Lo! Hamkuwa na chochote. Fisi alitweta. Jasho jembamba lilimtoka. Hakufahamu kitendawili hiki. Fisi wengine sasa walimzunguka. Aliogopa. Fisi mmoja alimwambia autumbukize mkono tena. Alifanya vile. Fisi aligutuka kwani mkono wake ulikuwa unagusa mchanga. Looo!



Mkoba ulikuwa umetoboka upande wa chini. Maini yote yalikuwa yamepotea. Lakini wapi na hakuyaona?

Fisi mmoja aliyekuwa mzee akamwambia, “mimi niliona mkoba wako ulikuwa umetoboka lakini kwa kuwa hatuongeti sana, sikukuambia. Niliona ungeniita mzee. Najua kwamba



jirani yetu Ngiri ni fundi maarufu wa kushona mikoba lakini kwa kuwa wewe hutaki kushirikiana na yeyote, basi nikakuacha.”

Fisi mwingine naye akamwambia, “Wewe ulienda peke yako. Ulimwomba Mungu ini lako hili ambalo umekula mbele yetu, kama tungeenda wote Mungu angempa kila mmoja ini lake. Sasa hili lako lilikuwa likianguka naye Mungu alikufanya usilisahau, nawe kwa uchoyo wako uliliokota na kufikiria eti ni lingine. Kwani hukuweza kuhisi kama mkoba ulikuwa unaongeza uzito? Mara ingine kumbuka umoja ni nguvu. Sasa watoto wako watakaa njaa.

Fisi sasa alitanabahi yaliyotokea. Aliamka na kukimbia huku akipiga



nduru, kubwa. Fisi wengine walimfuata walimpigia nduru pia. Msitu wote ulijaa nduru za Fisi. Kwa vile yeye alikuwa amekula, aliwashinda wenzake kwa mbio. Aliogopa wangemla. Alihofia maisha yake. Aliangalia nyuma na kuwaona wenzake wameambua vumbi

kubwa wakimfuata. Alikumbuka  
mkataba wake na Mungu. Aliomba  
msamaha lakini wakati huu Mungu  
hakumwahidi chochote.



## Maswali

1. Fisi alipoomba alipewa mawaidha gani?
2. Ini ni nyama gani?
3. Taja nyama zingine tatu ambazo hazina mifupa.
4. Mzoga ni nini?
5. Kitu gani kilimfanya Fisi kufurahi sana?
6. Alipopata ini, aliliweka wapi?
7. Fisi alipofika nyumbani alikuwa na maini mangapi?
8. Mfuko wa Fisi ulikuwa na nini?

9. Jirani wa Fisi alikuwa nani na alikuwa fundi wa nini?

10. Hadithi hii inatufunza nini?